



EDISI
BM

PERCUMA
KDN PP11732/12/2012 (032229)

UNTUK AHLI SAHAJA

DISEMBER 2016

KEMAS KINI HARIAN UNTUK ANDA: BERITA, RENCANA, WAWANCARA, ANALISIS POLITIK SEMASA

www.roketkini.com

Rocket

"Ini perhimpunan halal"
- Tun Mahathir

> muka 5

facebook.com/roketkini

twitter.com/roketkini

roketkini@gmail.com

www.dapmalaysia.org

MENUJU MALYSIA BARU



NOTA EDITOR
Rakyat Malaysia tak mudah lupa..

Maria Chin ditangkap petang Jumaat, sebelum berlangsungnya perhimpunan Bersih 5 pada 19 November 2016. Maria disiasat di bawah Akta Kesalahan Keselamatan (Langkah-langkah Khas) 2012 (SOSMA). Beliau justeru boleh dituduh tanpa bicara, tanpa perlu dibawa ke mahkamah, dikurung dalam sel seluas 15 kali 8 kaki, tanpa tingkap, selama 28 hari.

Maria Chin, wanita berusia 60 tahun yang memandu sebuah kereta usang macam nak luruh bumper, dan mengambil masa yang cukup lama untuk membalsas mesej di telefon kerana menaip dengan hanya satu jari, kini dianggap seakan pengganas dan didakwa menggugat ketabahan negara dan demokrasi.

Kita semua tahu Maria bukan seorang pengganas. Dengan perawakan lembut penuh sifat keibuan, wanita ini kini dikurung tanpa tahu siang malam. Malah tidak mengetahui di mana dirinya berada.

Banyak pihak telah mengecam tangkap ke atas ibu kepada tiga orang anak lelaki ini. Paling menarik barangkali ialah bekas Perdana Menteri yang bertanggungjawab mengurung arwah suami Maria, Allahyarhan Yunus Lebai Ali ke dalam ISA ketika Ops Lalang turut mengecam tindakan tahan tanpa bicara di bawah SOSMA itu.

Tun Dr Mahathir Mohamad malah hadir ke acara vigil mendesak pembebasan Maria, bersama isterinya Tun Dr Siti Hasmah. Mantan Perdana Menteri berusia 91 tahun itu bahkan dilihat sebagai pemuka utama perhimpunan Bersih 5, setelah bergegas pulang dari lawatan ke Sudan pada tengah hari Sabtu dan terus ke Bangsar untuk menyertai puluhan ribu rakyat Malaysia berbilang kaum yang sudah setia menunggu untuk bergerak menuju ibu kota.

Mahathir, meski kelihatan letih dan tidak begitu bermaya, nampaknya masih bersemangat dan gigih untuk akhirnya duduk di benteng-benteng jalanraya bersama rakyat yang dahulu membencinya. Walaupun ramai yang masih menuntut permohonan maaf atas 'dosa-dosa' lama, namun tindakan ternyata lebih memberi kesan berbanding kata-kata.

Entah berapa baldi lagi air ludah sendiri yang harus Mahathir telan untuk mencuci daki-daki kesalahan lalu. Dan meski sudah dua kali turun Bersih, kekotoran lama masih belum lekang dari ingatan rakyat Malaysia. Ternyata, kita semua tidak mudah lupa..

BERSIKHAKH DOSA MAHATHIR SETELAH TURUN BERSIH?

Oleh ZAKI SUKERY

Tidak. Bersih tiada kaitan dengan 'dosa' Mahathir. Bahkan Bersih tidak bermula dengan Mahathir dan saya percaya ia tidak akan berakhir dengan Mahathir. Sendi Bersih merentas agama, ideologi, warna kulit, bahasa dan bangsa. Wilayahnya adalah pasak hak dan keadilan kepada rakyat miskin, sederhana dan kaya. Fokusnya anjal dan tidak statik, seiring dengan perubahan masa pengajuran, lazimnya menjadikan Pilihanraya Umum sebagai target. Kali ini, Bersih 5 datang dengan lima tuntutan.

Tulisan ini diluncurkan sehari sebelum tarikh genap 10 tahun pelancaran rasmi Bersih di lobi Parlimen pada 23 November 2006. Ketika itu, ia disertai oleh parti politik pembangkang dari PAS, PKR, DAP dan PSM termasuk NGO-NGO seperti MTUC, WDC dan SUARAM.

Tulisan ini seterusnya diluncurkan bagi melontarkan sisi pandang penyertaan Tun Dr. Mahathir Mohamed ke Bersih 5, setelah pada tahun sebelumnya juga muncul di Bersih 4.

Berbeza dengan Bersih 1 hingga Bersih 3, Bersih 4 dan Bersih 5 dikejutkan oleh kemunculan Tun Dr. Mahathir. Jika kemunculan Tun pada Bersih 4 seketika cuma, kemunculan pada Bersih 5 seolah-olah menimbulkan panik lagi bingung kepada lawannya. Lantas ibarat askar yang diserang hendap, dimuntahkan saja peluru daripada hujung picu tanpa hala tuju. Ia respon balas segera kerana Tun pada awalnya tidak akan turun!

Benar, terlalu banyak 'dosa' Tun jika mahu dihitung sepanjang 22 tahun berada di puncak kekuasaan. Beliau 'membunuh' kepimpinan berpotensi pernah dilahirkan oleh bangsa Melayu. Tun Musa Hitam dikerandakan kerjaya politiknya, Tengku Razaleigh Hamzah dihumban dari arus perdana dan hanya gah dalam bulatan pengaruh sendiri, Datuk Seri Anwar Ibrahim diperlaku dengan sehina-hinanya sekali.

Lebih teruk daripada itu, 'dosa' Tun juga seputar pada menyebabkan kegagalan dan/atau penysiasatan ke atas kes kroni melibatkan Barisan Nasional (BN) seperti isu siasatan lanjut dalam kes PERWAJA dan Mendiang Eric Chia, penyelewengan dana awam untuk kepentingan BN seperti isu rompakan royalti minyak Terengganu ditukarkan menjadi wang ehsan, menyalahgunakan akta 'drakonian' seperti kes ISA, OSA dan Akta Mesin Cetak bagi kepentingan BN seperti ketika Operasi Lalang, Tragedi Memali dan Gerakan Reformasi, mempengaruhi integriti dan kebebasan kehakiman seperti kes fiasco Tun Salleh Abbas dan kes Liwat I Anwar.

Ini semua menjustifikasi gelaran yang dilemparkan kepada Mahathir sebagai si 'Mahafiraun'. Sehingga Litar F1 Sepang dipotretkan menyerupai gambaran hidung Tun menandakan bongkok, angkuh dan sombong dengan kekuasaan. Kalau diikutkan hati kita ini, boleh jadi jika seluruh lautan yang

Tun telah menggunakan segala saluran yang ada untuk 'menasihati' Najib namun ia tidak diendahkan. Saluran dalaman, saluran proksi hatta saluran Majlis Raja-Raja. Semuanya. Tiada hasil.

memenuhi dunia dijadikan dakwat untuk menulis 'dosa' Mahathir pun nescaya tidak akan habis ditulis sekalipun kering lautan tersebut. Persoalannya, sampai bila?

Tun menginjak ke usia 91 tahun. Ada sakit. Sakit orang tua. Tun hilang jawatan Penggerusi Proton. Tun tiada lagi di kerusi Penasihat Petronas. Ia harga mendapatkan hak yang adil kepada rakyat.

Ucapan Tun di Bersih 5 pun termengah-mengah. Sekejap dengar sekejap tidak. Mungkin penangan 10 jam penerangan dari Sudan di sebalik usia semakin senja. Tun boleh saja berterusan menghirup secangkir kopi dengan kepingan biskut. Tun boleh saja berterusan melayan hidup dengan belakangnya dipanjang-panjang oleh cucu-cicit ketika sujud atas tikar sejada. Tun boleh saja berterusan menikmati duit penceh kerajaan dan makan angin di luar negara.

Tetapi mengapa jalan ini dipilih?

IMDB seumpama 'ibu kepada segala kezaliman' kepimpinan hari ini. Peguam Negara dipencenkan, Gabenor Bank Negara digantikan, Pengarah SPRM ditukarkan, Jawatankuasa PAC di kalangan BN dilantik sebagai Menteri dan Timbalan Menteri antara contoh kebobrokan sang penguasa bagi mensucikan isu IMDB. Juga, berapa banyak lagi agensi awam yang mahu kita biarkan untuk menyemalatkan hutang IMDB? Berapa ramai lagi rakyat seperti Rafizi yang mahu kita biarkan dihukum penjara kerana mendedahkan penyelewengan pemerintahan negara? Nilai Ringgit Malaysia pula makin lemah. Makan di luar, kena caj GST. Makan di rumah, minyak masak ditarik subsidi. Terbaru, caj di hospital turut akan dinaikkan.

Persoalannya, sejauh mana seluruh rakyat Malaysia sedar duit mereka ditarik perlahan-lahan atas pelbagai nama; 'rasionalisasi subsidi' atau 'mengikut harga pasaran' yang semuanya adalah untuk menampung perbelanjaan dan membayar hutang negara? Rakyat yang

waras faham bahawa konsep hidup bernegara seharusnya menelurkan sedikit-sebanyak sumbangan mereka kepada negara namun masih waraskah kita apabila dalam masa sama pula membiarkan Jho Low bergelumang dengan duit di sana-sini?

Tun telah menggunakan segala saluran yang ada untuk 'menasihati' Najib namun ia tidak diendahkan. Saluran dalaman, saluran proksi hatta saluran Majlis Raja-Raja. Semuanya. Tiada hasil.

Akhirnya, Tun melihat penambahbaikan institusi yang dimahukan wujud oleh Bersih. Bahkan Tun sebelum itu memandangnya pula hatta ke tahap kerjasama dengan parti politik pembangkang. Kali ini, bukan lagi menjatuhkan Najib tetapi keseluruhan komponen BN yang merosakkan 'sistem nilai' pemerintahan negara.

Benar, Tun juga pernah melakukan perkara sama bahkan boleh jadi lebih teruk. Jika diumpamakan komponen sebuah keluarga, Tun ialah seorang ayah. Seorang ayah jarang memohon maaf apabila melakukan kesilapan. Egois seorang lelaki. Lelaki biasanya memohon maaf melalui perbuatan. Hakimi lelaki lebih kepada perbuatan berbanding perkataan. Perbuatan Tun menggempur BN seolah-olah menggambarkan kemaafan berpintapinta daripada rakyat Malaysia. Walau, saya lebih suka Tun turut menuturkannya dengan kata-kata. Ia lebih mengharmonikan mengambil kira sinergi antara perkataan dan perbuatan.

Hari ini segala ungkapan Tun menjurus ke arah 'common point of agreement' atau 'kalimat-in-sawa' (dalam bahasa Quran). Bukankah ia 'bahasa' yang kita tuturkan setiap hari? Benar, Tun banyak 'dosa'. Namun bukankah lebih baik bersama si 'syaitan yang dikenali'?

Sedangkan Firaun pun bertaubat sebelum mati walau tidak diterima kerana nyawa telah berada pada halkum apatah lagi 'Mahafiraun', kan? Jika Tun benar-benar telah bertaubat dan nyawa pula masih belum berada pada halkum lagi, siapa kita untuk mengambil alih urusan Tuhan?

Lalu, usah menjadi Tuhan menghakimi Tun bersama dengan Bersih. Lalu, usah umpamakan mengajar doa tidur pada saat perlunya melawan kezaliman mentang-mentang kami tiada isteri kanan-kiri untuk dipeluk. Lalu, usah mengajar kami dalam dunia demokrasi yang dijamin hak berhimpun dan bersuara dalam Perlembagaan bahawa satu-satunya adalah melalui pilihanraya sedangkan padang tidak sama rata. Sampai bila kita mahu bertahan berpeluk tubuh dengan 'sistem nilai' pemerintahan yang rosak dan merosakkan?

Albert Einstein pernah menyebut, dunia jadi tempat celaka untuk didiami bukan kerana kejahatan yang dilakukan para penjahat, tetapi akibat mereka yang diam tidak buat apa-apa. Lebih kurang begitulah.

RUU355: HAJI HADI TERTIPU LAGI

Oleh DATUK MOHAMAD ARIFF SABRI

Mari kita mula dengan menyebut yang tidak tersebut. Meminta lebih kuasa dan hak untuk menjatuhkan hukuman yang lebih berat ialah kaedah orang pemalas. Ianya juga kaedah orang yang cenderung kepada pemerintahan kuku besi dan diktator. Semua orang yang berfikiran waras yang mau melindungi masyarakat dari perluasan kuasa pemerintah dan kumpulan yang mahukan kuasa dan meletakkan rakyat dibawah kebuasan kawalan, mesti berwaspada.

Usaha menghimpun kuasa - apa jenis jua pun, temporal dan sekular, spiritual dan agama, sedang meningkat hari ini. Kita menghadapi krisis ekonomi Melayu misalnya yang konon memerlukan perluasan program kerajaan; kita berdepan dengan krisis moral dan kelunturan akhlak, penyelesaiannya juga melalui perluasan kuasa kerajaan. Krisis akhlak dan kehakisan pedoman agama khususnya memerlukan penyelesaian melalui pemerkasaan mahkamah syariah dan pengenaan hukuman yang lebih berat.

Tanpa mengurangkan penghormatan kepada tokoh agamawan, perlu kita sebut disini, kita tidak terikat dengan penghormatan tersebut sehingga malu menegur golongan seperti Haji Hadi dalam kapasiti mereka sebagai ahli politik. Mereka handal dalam bidang ilmu mereka, tapi dari segi politik, mereka sepadai atau sebodoh kita jua. Pandangan politik mereka mungkin baik atau kurang teliti. Sebagai seorang ahli politik, Haji Hadi umpamanya, tidak mempunyai kelebihan apa2 pun malah, dilihat oleh umum, sebagai mangsa manipulasi politik UMNO. Sudah dua kali Haji Hadi berhenti pada perkara 49(1) Peraturan Mesyuarat sedangkan ianya boleh membawa kepada pembacaan kali pertama. Kenapa Haji Hadi tidak mahu peluang untuk menghuraikan usul nya?

Ini isu kelolaan dan mengurus kapasiti yang ada. Ternyata, mahkamah syariah dan warga yang beroperasi di bawahnya - hakim, peguam, pentadbir, sehingga menteri yang menjaga institusi pelaksana keislaman, gagal mengelola dan mengurus apa yang mereka ada. Ada beribu kes perceraian dimana wanita yang diceraikan teraniaya kerana kes mereka lama belum diselesaikan. Kes tukar agama; kes penculikan si mati untuk ditanam dimana. Kualiti hakim, pendakwa raya, pegawai penyiasat masih belum diselesaikan tapi mereka mahukan kuasa yang lebih dan hukuman yang lebih berat.

Lalu mereka menyalahkan kekurangan kuasa dan hukuman yang ringan sedangkan isu sebenarnya ialah kelemahan mereka. Mengapa mereka tidak dapat selesai masalah tidak patuh syariah? Sebab penyampaian keadilan dan hukum Islam mereka lemah dan tidak cekap. Jadi mereka datang kepada kita mahukan kuasa besar, luas dan kapasiti menjatuhkan hukuman yang lebih berat.

Dan amat mudah menyembunyikan kelemahan dan kekurangan mereka - cabar keislaman masyarakat. Jika tidak sokong; murtad, anti Islam, kafir dan



mati nanti, tidak di perkuburan Islam. Ini adalah ugutan spiritual.

Kita tidak akan berikan apa yang mereka mau tanpa terlebih dahulu mereka melayakkkan diri untuk mendapat kuasa tersebut. Dan kita jangan lupa mengambilkira kemungkinan, kuasa yang lebih luas dan keupayaan mengenakan hukuman yang lebih berat berada dalam tangan pelampau agama. Dalam tangan golongan pelampau, hukum Islam jadi senjata penindasan dan pencabulan. Bayangkan jika kuasa yang luas berada dalam tangan individu yang memfatwakan jika Wan Azizah mati, dia di kebumi di jirat; bayangkan jika kuasa luas ada dalam tangan orang sepemikiran mufti Pahang yang mengkafir-harbikan orang DAP. Huru hara negara kita.

Tunjuk kepada kita kebolehan, kecekapan, kemantapan prosidiur, kecenderungan kepada membela golongan lemah bukan menyebelahi yang berkuasa dan kaya.

Kehakiman Islam di negara kita gagal membuktikan dengan bersenjatakan kuasa yang lebih dan hukuman yang berat, mereka berkemampuan membaiki kejahatan orang Muslim.

Dalam tahun 1965, kita ada penjara 6 bulan dan denda RM1000. Kita cakap ini tidak mencukupi; maka bermula 1985, kita ada sistem 3-5-6. Penjara 3 tahun, denda 5 ribu dan sebat 6 kali. Hukuman ini lebih berat dari apa yang ada pada tahun 1965. Kita pun ingat dengan hukuman yang lebih berat dan kuasa yang meluas, penyakit jahat kaum Muslim dalam negara selesai atau berkurang?

Adakah 3-5-6 mampu membendung orang Islam yang jahat? Tidak. Kes perceraian tinggal begitu sahaja, mencuri dan merompak oleh orang Islam, zina, seks luar tabii, rasuah, dan segala kesalahan dalam senarai negeri terus berlaku.

Apa maksudnya ini? Kuasa yang lebih luas dan hukuman yang lebih berat telah gagal digunakan oleh mahkamah syariah untuk membaiki umat Islam dalam negara ini. Bererti kaedah perundungan sahaja, tidak mencukupi untuk membaiki umat Islam tanpa disertai oleh langkah

yang lebih menyeluruh. Sudahkan institusi Islam melakukan ini semua?

Kamu meminta kita semua, memberi alasan dan justifikasi ke atas ketidakcekapan kamu dengan meminta lebih kuasa dan hukuman yang lebih berat?

Jika demikian, golongan politik agama, tidak ada beza dengan Najib. Apa Najib buat bila berdepan dengan musibah hasil tangan nya? Dia mahukan lebih kuasa. Kuasa untuk menekan dan menindas rakyat. Maka dia ada akta hasutan, dia ada POCA, POTA, SOSMA dan undang-undang lain yang zalim.

Ini petanda orang yang berotak diktator. Di samping itu, semua institusi yang menjaga kepentingan rakyat dirampas oleh Najib - institusi sahih untuk menekan rakyat khususnya polis, institusi kepeguanan negara, kehakiman berada di bawah telunjuk Najib. Diktator suka menghimpun kuasa dalam tangan nya sendiri.

Dari perspektif ini, Haji Hadi juga berminda diktator. Dia mahukan lebih kuasa. Dia mahukan hukuman yang lebih berat. Yang kena hukuman berat ialah orang miskin dan wanita dan golongan mustadzafin.

Haji Hadi dan Najib seminda bila tamakan kuasa. Janganlah orang Melayu menyangka, ulamak terlepas dari kerakusan mahukan kuasa yang tidak disoal dan di cabar. Ulamak juga korup dan rasuah, ulamak juga melakukan pelbagai kemungkar. Ulamak juga bila berada atas mimbar pun turut memutar ayat-ayat Al-Quran.

Bagaimana golongan seperti Haji Hadi mahu selesaikan masalah kaum Muslim di Malaysia? Dengan menambah kuasa dan menggunakan hukuman yang lebih berat yang berat sebelah menzalimi wanita dan golongan mustadzafin.

Mahkamah syariah bergantung kepada kebolehan hakim dan peguam-pegawaiannya. Kepentingan yang mereka wakili adalah kepentingan yang berkuasa, yang kuat dalam masyarakat. Tidak ada beza dengan institusi2 yang dibawah telunjuk Najib yakni yang menjaga kepentingan 5% teratas, yang kaya dan yang berkuasa.

Jalan pintas ialah menambah kuasa dan isytihar akan denda RM100 ribu, sebanyak 100 kali dan penjara 30 tahun. Itu hanya memerlukan menepuktahniah belakang sendiri, hanya perlu memuji emosi dan kesyahduan keinginan untuk mengislamkan semua dan penyeruan langsung kepada orang Melayu yang bergama Islam.

Sedangkan membaiki kaum Muslim secara lebih menyeluruh memerlukan penghujjahah, seruan tarbiyah yang bijak, menyeru kepada bahagian rasional otak dan usaha yang lebih rapi, kesemuanya tidak disukai oleh golongan pemalas dan golongan bergantung kepada hak semula jadi.

Maka, salahkan semuanya kepada faktor luar. Kali ini salahkah kepada kelemahan mahkamah syariah, mahkamah syariah tidak cukup kuasa dan hukuman keatas penjahat dan pesalah laku tidak berat.

Jika kemungkaran kaum Muslim tidak dapat dibendung, ianya mesti berpunca dari dalam diri. Janganlah kita bertempiaran sana sini, mengatakan bahawa ini semua orang salah orang lain.

Jika Haji Hadi gagal mempengaruhi orang Islam mengenai RUU 355, jangan salahkan DAP. DAP hanya ada kekuatan 37 MP dalam parliment, dan hanya dapat mempengaruhi majoriti orang Cina dan rakyat Malaysia yang lain.

Al-Quran menyebut bahawa Allah tidak mengubah keadaan sesuatu bangsa kecuali bangsa tersebut mengubah apa yang ada dalam diri mereka. Lihat Al-Quran 13:11.

Al-Quran menyebut lagi, Allah tidak mengubah nikmat yang dirasai kecuali bangsa tersebut megubah apa yang ada dalam diri mereka. Lihat Al-Quran 8:53.

Ternyata, kita mesti terlebih dahulu melihat ke dalam diri kita terlebih dahulu.

Adakah kita mempunyai perbendaharaan nilai-nilai yang menyokong keadilan dan kesaksamaan, nilai anti rasuah, anti kemungkar, anti kejahatan, anti pemimpin yang rasuah, nilai-nilai positif yang lain? Lihat kepada ini dahulu, sebelum senang-senang menyalahkan orang lain kecuali diri kita.

Pakcik 75 tahun gagahkan diri turun ke jalanraya, tuntut kerajaan adil

Oleh HAFIZ ZAINUDDIN

KUALA LUMPUR: Mungkin kata-kata ‘dunia akhirnya milik orang muda’ yang memberi konotasi kepada semangat perlawanan orang muda boleh dimaknakan semula.

Begitulah yang terlihat apabila seorang warga emas Tajuddin Hawari atau lebih dikenali sebagai Pak Din, 75 tahun sanggup meredah terik matahari apabila beliau berjalan kaki dari Masjid Negara menuju KLCC bersama peserta Bersih 5 yang lain pada 19 November lalu.

Ketika disapa Roketkini, Pak Din berkata beliau datang dari Parit Buntar menaiki keretapi bersama beberapa temannya yang lain.

“Pakcik dari Parit Buntar naik keretapi,” kata pesara juruteknik JKR Perak itu.

Menurut Pak Din, beliau sanggup hadir ke perhimpunan Bersih 5 untuk menyatakan rasa tidak puas hatinya kepada kerajaan Barisan Nasional.

“Saya berjalan demi negara. Demi bersihkan pilihanraya Malaysia, dah teruk sangat dah sekarang,” ujarnya menambah

penyelewengan yang berlaku dalam negara saat ini menjelaskan negara dan rakyat.

Pak Din berkata, walaupun rakyat negara ini semakin terbeban dengan kos sara hidup yang tinggi, masih ramai golongan luar bandar khususnya golongan berusia masih menyokong BN.

“Mereka masih nak ‘lama’ (Umno-BN). Tak berubah.

“Tapi bila pakcik tengok, anak-anak mereka bila balik kampung, banyak yang sudah berubah, tak sama dengan mak bapak depa,” jelasnya.



Orang Asli sertai Bersih perjelas isu kemusnahan akibat pembalakan di Kelantan

Oleh FATIH HASSAN NORDIN

KUALA LUMPUR: Seramai kira-kira 50 Orang Asli dari suku Temiar menyertai perhimpunan BERSIH 5 yang diadakan di sini, 19 November lalu.

Mereka yang mewakili pertubuhan badan bukan kerajaan (NGO) Jaringan Kampung Orang Asli Kelantan (JKOAK) dan Jaringan Kampung Orang Asli Semenanjung Malaysia (JKOASM) berhimpun di perkaranan Masjid Negara sambil membawa sepanduk.

Antara sepanduk yang mencuri tumpuan peserta seperti ‘Pertahankan Hak Tanah Adat Orang Asli’ dinaikkan bertujuan untuk memberi kesedaran berhubung isu pembalakan haram hutan simpan di negeri Kelantan selain menuntut agar kerajaan mendengar tuntutan mereka.

Setiausaha JKOAK, Mustafa Along dalam ucapannya berkata, isu pembalakan di Gua Musang semakin menjadi-jadi dengan pihak berkuasa telah mengeluarkan notis supaya



‘blockade’ yang dibina mereka di Pos Gob dibuka selewatnya pada hari itu atau berdepan tindakan dirobohkan.

“Kuasa dan hasil hutan adalah di bawah kerajaan negeri, justeru, saya

mewakili rakan-rakan di Gua Musang menuntut supaya kerajaan negeri tidak menghalang kami daripada mendapatkan hasil rezeki dari hutan tersebut dan menyusahkan kami.

“Malah kami tolak kerajaan zalim yang bertopengkan agama,” katanya.

Penyelaras JKOASM, Tijah Yok Chopil pulu membangkitkan mengenai kesusahan yang dihadapi kaum Orang Asli ekoran pembalakan haram yang dijalankan kerajaan negeri dan menurutnya dikuat oleh ‘orang kaya-kaya’ dan kroni.

“Kehidupan kini semakin terhimpit. Ia bukan hanya dirasai oleh orang bandar, tetapi juga dirasai oleh Orang Asli. Walaupun orang kata kami tak payah itu tak payah ini tapi tekanan yang hebat dirasai oleh kami di hutan belantara sana.

“Sebab para kroni, para syarikat, orang kaya-raya yang duduk di bandar mereka mencari ‘wang’ di hutan belantara yang kami jaga,” katanya disambut dengan teriakan ‘kita lawan’ oleh peserta.

Wakil-wakil NGO Orang Asli itu kemudiannya bersama-sama peserta BERSIH 5 bergerak menuju ke perkaranan Menara Berkembar Petronas, KLCC.

Turun demo, pemimpin PAS serah nasib kepada kepimpinan parti

KUALA LUMPUR: Siapa sangka ada pemimpin dan ahli PAS sanggup dan berani turun ke perhimpunan Bersih 5 walaupun parti itu sebelum ini menetapkan pendiriannya tidak menyokong perhimpunan aman tersebut.

Bahkan terbaharu ialah kenyataan Presiden PAS sendiri Datuk Seri Abdul Hadi Awang menegaskan bahawa ahli PAS yang didapati menyertai perhimpunan Bersih 5 bakal berhadapan tindakan, jika pihaknya mendapat aduan.

Ekoran perkembangan itu, Ahli

Parlimen Pokok Sena Datuk Mahfuz Omar berkata beliau sedia berhadapan sebarang tindakan disiplin kerana menyertai Bersih 5.

Sambil menyerahkan keputusan kepada jawatankuasa disiplin parti, Mahfuz berkata tindakannya menyertai Bersih 5 adalah demi memperjuangkan kepentingan rakyat.

“Apa yang saya buat adalah untuk rakyat. Saya menghadiri Bersih untuk rakyat Malaysia.

“Saya serah kepada jawatankuasa disiplin parti untuk buat keputusan. Terpulang kepada mereka menilai sama ada saya telah melakukan kesilapan”

ada saya telah melakukan kesilapan,” jelasnya kepada pemberita di Parlimen pada 22 November lalu.

Sebelum ini telah tersebar di media sosial beberapa gambar pemimpin dan wakil rakyat PAS yang turut serta dalam perhimpunan aman Bersih 5.

Selain Mahfuz, antara wakil rakyat PAS yang menyertai Bersih 5 ialah Ahli Parlimen Kubang Kerian Ahmad Baihaqi, Ahli Parlimen Pasir Putih Dr Nik Mazian, ADUN Batu Burok Dr Syed Azman Syed Ahmad Nawawi, ADUN Kubang Rotan Mohd Nasir Mustafa dan ADUN Anak Bukit Ir Amiruddin Hamzah.

Saya serah kepada jawatankuasa disiplin parti untuk buat keputusan. Terpulang kepada mereka menilai sama ada saya telah melakukan kesilapan”

**DATUK MAHFUZ OMAR
Ahli Parlimen Pokok Sena**

“Ini tunjuk perasaan halal dan penting” Tun Dr Mahathir gesa Najib berundur

OLEH HAFIZ ZAINUDDIN

KUALA LUMPUR: Kemunculan Tun Dr Mahathir Mohamad dan isterinya, Tun Siti Hasmah di perhimpunan BERSIH 5 memberi mesej jelas kepada rakyat Malaysia bahawa Perdana Menteri Datuk Seri Najib Razak harus berundur.

Disaksikan puluhan ribu peserta, Tun Mahathir mengucapkan tahniah kepada rakyat yang berani hadir ke perhimpunan aman itu.

“Saya bangga tuan-tuan puan-puan tak sedikit pun takut. Berani kerana benar. Takut kerana salah.

“Saya syukur balik awal (dari lawatan ke Sudan) sempat ambil bahagian dalam BERSIH. Ini adalah tunjuk perasaan yang halal dan penting,” katanya.

Dr Mahathir menyelar Najib di atas salahguna kuasa polis yang bercanggah

dengan undang-undang berikutnya penangkapan pemimpin-pemimpin utama BERSIH dan pembangkang.

“Najib tidak layak jadi Perdana Menteri. Kita sedih dia salah guna kuasa ke atas polis untuk buat perkara yang bercanggah dengan undang-undang.

“Kita jangan takut. Biar dia datang tangkap kita semua. Kita akan berdiri bersama! Kita pertahan pemimpin kita termasuk Maria Chin.

“Yang penting kita bersatu tak kira kaum. Dalam keadaan aman,” kata beliau.

Menurutnya, Najib tidak layak memimpin Malaysia akibat isu penyelewengannya melibatkan 1MDB yang menyebabkan imej Malaysia tercalar dengan gelaran ‘negara kleptokrasi’.

“Negara kita sekarang ditadbir penyangak dan pencuri. Dunia mengenal Malaysia sebagai negara kleptokrasi.

Sebuah negara dipimpin penyangak dan penyamun.

“Walaupun umur saya dah tinggi sikit. Tapi saya bersama dengan rakyat mahu Najib undur,” tegasnya disambut tepukan dan sorakan gemuruh peserta.

Beliau menyeru rakyat supaya meneruskan perjuangan untuk sebuah kerajaan adil dan demokratik berlandaskan Perlembagaan Persekutuan.

“Teruskan perjuangan ini kerana ini perjuangan mulia bukan seperti perjuangan Datuk Seri Najib yang kleptokrasi,” kata Dr Mahathir.

Justeru, untuk melakukan perubahan pentadbiran kerajaan, rakyat perlulah bijak memilih parti yang benar-benar serius dan peduli kepada perjuangan rakyat terbanyak.

“Sertai pembangkang PPBM, PKR, Amanah dan DAP yang serius jatuhkan



BN dalam pilihanraya,” kata beliau.

Perhimpunan Bersih 5 berjalan lancar walaupun wujud beberapa sekatan polis bagi mengelak pertembungan dengan gerombolan Baju Merah.

Tuntut pembebasan Maria Chin, kumpulan wanita berarak ke Parlimen



Oleh SYAZANA HASANUDIN

KUALA LUMPUR: Hampir 500 individu dari pelbagai latar belakang menyertai program ‘Wanita Bergerak untuk Maria’ di ibu kota pada 23 November lalu bagi menuntut pembebasan Penggerusi Bersih 2.0, Maria Chin Abdullah tanpa syarat dengan segera.

Kumpulan itu berhimpun di Padang Merbok sebelum berarak ke Parlimen bagi menghantar memorandum kepada Perdana Menteri untuk membantah penahanan Maria dibawah Akta Keselamatan Keselamatan (Langkah-Langkah Khas) (SOSMA) 2012.

Beliau ditahan ekoran penganjuran perhimpunan Bersih 5 pada 19 November lepas.

Di Padang Merbok, beberapa aktivis dan ahli politik pembangkang memberi

ucapan bersemangat bagi membantah penahanan Maria di bawah akta drakonian tersebut.

Adun Subang Jaya, Hannah Yeoh dalam ucapannya berkata semua pihak yang mahukan kebaikan untuk negara harus menyokong perjuangan Maria, dan salah satunya adalah dengan menuntut beliau dibebaskan.

“Individu baik seperti Maria yang memperjuangkan perkara-perkara baik tidak harus dibiarkan keseorangan. Sebab itulah kita ada di sini. Kita takkan tinggalkan mereka bersendirian.

“Saya di sini bukan saja mewakili wanita, tetapi juga untuk menyokong tuntutan Bersih 5, iaitu mengukuhkan demokrasi berparlimen.

“Oleh itu kita mesti desak Menteri Dalam Negeri dan Perdana Menteri untuk bebaskan Maria pada hari ini,”

kata Speaker DUN Selangor itu, disambut sorakan gemuruh mereka yang hadir.

Bekas Pengurus Majlis Peguam, Datuk S. Ambiga pula menegaskan, Maria merupakan seorang ‘hero’ dalam perjuangan hak wanita, justeru penahanannya telah memberi kesan kepada seluruh wanita di negara ini.

“Maria berjuang hanya untuk kebenaran. Sebab itulah pihak autoriti takut kepada beliau dan takut kepada Bersih.

“Jangan biarkan mereka memandang rendah kuasa dan keupayaan wanita di negara ini. Kita akan buat kempen agar semua wanita tidak lagi mengundi kerajaan yang menahan Maria ini pada pilihan raya akan datang,” tegasnya.

Membawa kain rentang ‘Wanita bergerak untuk Maria’, kumpulan itu kemudiannya berjalan kira-kira dua kilometer dalam

“Individu baik seperti Maria yang memperjuangkan perkara-perkara baik tidak harus dibiarkan keseorangan. Sebab itulah kita ada di sini. Kita takkan tinggalkan mereka bersendirian”

- HANNAH YEOH
Speaker DUN S’gor

pakaian kuning dan ungu ke Parlimen. Mereka turut membawa plakat dengan pelbagai slogan, antaranya ‘Kita Semua Maria Chin’ dan ‘SOSMA Sucks’.

10 wakil kumpulan itu kemudiannya masuk ke Parlimen dan menyampaikan memorandum berkenaan kepada Menteri di Jabatan Perdana Menteri, Datuk Seri Shahidan Kassim serta Datuk Nancy Shukri.

Sementara itu, peserta di pekarangan luar Parlimen terus melaungkan slogan ‘Bebas Maria’, ‘Mansuh SOSMA’ dan ‘Najib, shame on you’ dengan penuh bersemangat.

Program berkenaan dianjurkan oleh aktivis wanita termasuk rakan dan penyokong Maria yang menganggap penahanan ibu kepada tiga anak itu di bawah SOSMA sebagai tidak wajar dan keterlaluan.

LAMAN PANAS



Dunia terkejut Donald Trump jadi Presiden AS

Kemenangan Donald Trump sebagai presiden Amerika Syarikat (AS) ke-45 baru-baru ini disifatkan sebagai kejutan luar biasa apabila mengalahkan pesaingnya Hillary Clinton yang sebelum ini diramalkan menang. Kemenangan taikun hartanah AS itu mencetuskan kebimbangan banyak negara lantaran kontroversi demi kontroversi yang timbul dalam siri kempennya. Trump antara lain didakwa bersikap perkauman, anti-imigran, anti Islam selain seksis terhadap wanita.

Najib Razak berkaraoke dengan Presiden Filipina

Pertemuan Perdana Menteri Datuk Seri Najib Razak dengan Presiden Filipina Rodrigo Duterte di Putrajaya pada 10 dan 11 November lalu diakhiri dengan sesi karaoke dalam satu majlis jamuan kerajaan. Duterte mendendangkan lagu berjudul "Wind Beneath My Wings" oleh Bette Midler manakala Perdana Menteri melantunkan "The Young Ones" oleh Cliff Richards. Mereka kemudian berduet menyanyikan lagu "Sha-La-La-La-La" yang popular pada tahun 70-an oleh band rock Denmark, The Walkers sambil menggerak-gerakkan tubuh.




Orang dedah penyelewengan dihukum, yang tertuduh pula bebas

Ahli Parlimen Pandan, Rafizi Ramli telah dijatuhi hukuman penjara 18 bulan kerana mendedahkan penyelewengan 1MDB namun tertuduh yang terlibat dalam salah laku penyelewangan masih bebas. Ketua Parlimen DAP Lim Kit Siang berkata seseorang individu tidak patut dikenakan sabitan jenayah dan hukuman penjara hanya kerana berani mendedahkan penyelewangan dana kerajaan seperti apa yang berlaku ke atas Rafizi.

TMJ 'tembak' tujuh geng baju merah

Video parodi yang viral di Facebook baru-baru ini oleh Tengku Mahkota Johor, Tunku Ismail Sultan Ibrahim membawa mesej anti-keganasan. Ia disifatkan sebagai kritik terhadap tindakan ganas dan samseng yang sering ditunjukkan kumpulan Baju Merah. Dalam video tersebut, TMJ menembak tujuh lelaki berbaju merah setelah mereka mengadakan aksi 'silat'. Video itu disertakan dengan mesej: "Senjata tidak membunuh manusia, manusia yang saling membunuh antara satu sama lain. Keganasan dan kebencian tidak akan menjadikan negara ini tempat yang lebih baik. Kekal positif. Salam penuh kasih sayang".



Menteri UMNO ejek Ahli Parlimen wanita dengan kenyataan berbaur lucah

Dewan Rakyat baru-baru ini hangat apabila seorang menteri UMNO iaitu Ahli Parlimen Pasir Salak Datuk Tajuddin Abdul Rahman mengeluarkan kenyataan menghina dan lucah kepada Ahli Parlimen Seputeh Teresa Kok Suh Sim. Tajuddin dikecam ahli-ahli parlimen lain setelah berkata "Satu-satunya perempuan yang ada 'Kok' ialah Seputeh". Beliau digesa untuk memohon maaf.




Jamal Yunos 'buang tabiat' selepas Bersih 5

Selepas direman polis tiga hari, ketua kumpulan Baju Merah Datuk Jamal Yunos mendapat ilham untuk mencipta dan menggayakan lagu bagi mengejek perhimpunan aman Bersih 5. Sambil mengucapkan "Bersih 5 gagal" sebanyak enam kali dengan tersengih, beliau mengangkat kedua-dua tangannya di paras telinga dengan gaya mengejek. Video lagu Bersih 5 Jamal yang viral itu mendapat kecaman netizen.



Dipanggil polis setelah persoal penyelewengan 1MDB

Bekas Menteri Kewangan Kedua Datuk Seri Ahmad Husni Hanadzlah dan bekas Perdana Menteri Tan Sri Muhyiddin Yassin telah dipanggil polis berikutan ucapan mereka di Parlimen mempersoalkan penyelewengan berhubung skandal 1MDB melibatkan Perdana Menteri Datuk Seri Najib Razak. Tindakan polis itu bagaimanapun ditegur banyak pihak kerana Ahli-ahli Parlimen dilindungi hak keistimewaan mereka dibawah Akta 63(2) Perlombagaan Persekutuan.



BN JOHOR TIADA CALON BUKAN MELAYU

Oleh MAHDZIR IBRAHIM

Setelah meneliti rakaman potongan ucapan penggulungan Yang Amat Berhormat (YAB) Menteri Besar Johor, Datuk Seri Khaled Nordin khususnya berkaitan dakwaan beliau, kerajaan Pulau Pinang tidak membela nasib orang Melayu dan India semenjak memerintah negeri tersebut.

Untungnya seorang Menteri Besar yang bercakap semahunnya di dalam dewan negeri yang memberi imuniti sepenuhnya hak dan perlindungan dari disoal kembali oleh wakil pembangkang dalam sesi dewan.

Malangnya pula, saya bukan salah seorang wakil pembangkang di dalam dewan tersebut untuk menjawab dakwaan beliau itu. Apa boleh buat, sudah nasib.

Dari segi teknikal, memang cukup mudah untuk bercakap dan membuat dakwaan terhadap pihak yang tidak boleh atau dihalang atas sebab aturan mesyuarat dari menjawab atau menerangkan kedudukan isu tersebut. Ibarat, memukul orang yang kaki tangannya sedang diikat.

Perkara kedua, saya kira ucapan MB ini ditulis oleh orang yang amat terdesak untuk memberi peluru kepada bosnya untuk mengasak DAP atau, penulis itu memang tidak bersedia, atau tidak membaca atau enggan menyemak sepenuhnya intipati dakwaan tersebut.

Saya memahami 'politik' penulis-penu-

lis ucapan Menteri atau Exco atau ketua Pembangkang dalam hal-hal retorika politik dewan negeri atau dewan rakyat.

Saya tidak mahu mengulas butiran dakwaan Menteri Besar Johor kerana saya ingin biarkan kepada pihak yang lebih arif untuk menerangkannya.

Saya lebih berminat untuk menganalisa ucapan penggulungan yang disediakan oleh penulis-penulis Menteri Besar.

Pertama, saya tidak percaya ucapan itu dibuat oleh Setiausaha Kerajaan Negeri atau pegawai dari pihak Unit Perancangan Ekonomi Negeri (UPEN). Sebaliknya saya percaya ia dikarang oleh 'orang politik yang dipercayai oleh Khaled Nordin.

Seperkara yang Khaled Nordin perlu tahu ialah, ucapan beliau ini tidak ada isi. Masalah ketidaaan isi bila bermain retorik politik seperti ini, ia mencerminkan keterdesakan UMNO Johor yang dipimpin oleh beliau.

Saya percaya, Barisan Nasional yang dikepalai oleh UMNO, yang juga dipimpin oleh Khaled Nordin tidak mempunyai calon bukan Melayu yang meyakinkan untuk menang dan bertanding di Johor.

Perkara ini sememangnya merisaukan BN Johor yang sangat-sangat bergantung harap dengan undi tradisinya. Mereka tidak dapat lagi mengharapkan calon-calon dari MCA, Gerakan dan MIC yang sedia ada untuk membantunya mengekalkan kuasa di negeri Johor.

Masalah ini tambah nyata apabila Tim-



balan Perdana Menteri membayangkan bahawa BN sedang mempertimbangkan untuk memansuhkan kuota parti yang bertanding pada Pilihan Raya Umum Ke- 14 (PRU14).

Wakil-wakil rakyat MCA dan MIC di Johor ketika ini sangat tidak menyerlah khidmatnya, baik di peringkat Dewan Undangan Negeri (DUN) maupun sebagai EXCO. Ini cukup untuk mendatangkan masalah kepada UMNO Johor yang kini telah hilang majoriti dua pertiganya.

Kedua, apabila beliau mendakwa agenda DAP tidak sesuai dengan aspirasi Bangsa Johor, ini jelas memberi isyarat bahawa senjata mula makan tuan. Beliau sudah mula merasakan konsep 'Bangsa Johor' ini tidak dapat dimilikpunya oleh parti UMNO.

Menteri Besar ini seharusnya diin-

gatkan oleh rakan-rakan pemikir di sekelilingnya bahawa slogan Bangsa Johor ini, dihidupkan kembali oleh Tuanku Sultan Johor, bukan parti UMNO. Adalah satu fakta bahawa Tuanku Sultan dan Tengku Mahkota Johor lah yang sering mengutarakan konsep ini kepada rakyat, bukan Khaled Nordin atau UMNO.

Tuanku sendiri pernah bertitah bahawa konsep Bangsa Johor ini adalah milik anak Johor, tidak kira Cina, Melayu, India atau kaum apa sekalipun.

Khaled Nordin sedang cuba 'mencuri' konsep Bangsa Johor ini untuk laba politik UMNO. Itu saja, tiada isi yang kukuh pun.

Salah satu cara UMNO Johor untuk menjauhkan semangat Bangsa Johor dari DAP, hanyalah dengan membuat dakwaan sembarang seperti ucapannya didalam dewan itu, agar rakyat membenci DAP.

Ini tidak ada kena mengena dengan agenda DAP, sebaliknya ia hanyalah agenda sempit UMNO untuk memecahbelahkan keharmonian rakyat, ia hanya agenda Khaled Nordin yang semakin tersepit apabila rakyat sudah mula dapat menerima ahli dan wakil rakyat DAP Johor sebagai sebahagian daripada Bangsa Johor.

Isu paling besar yang cuba disembunyikan ialah, kerajaan UMNO BN Johor hari ini adalah penyokong tegar "Malaysia Official 1" (MO1), mereka adalah penyokong kerajaan kleptokrasi Najib Tun Razak.

KHALED NORDIN BERCERAMAH MEMBUTA TULI

Oleh WONG SHU QI

Ucapan penggulungan Menteri Besar semalam adalah ucapan yang paling teruk dalam Dewan Negeri selepas Datuk Seri Khaled Nordin menjadi Menteri Besar Johor. Paling penting sekali, ucapan beliau tidak berasas fakta, malah, membuat tuduhan bukan-bukan yang berunsur perkauman.

Amat malang sekali, Menteri Besar telah memperalatkan peluang menggulung perbahasan belanjawan negeri dengan menjadikan ia sebagai pentas ceramah politik. Sebenarnya peluang tersebut patut digunakan sebagai platform bagi menerangkan dasar belanjawan dan strategi pembangunan negeri bagi tahun yang akan datang serta menjawab soalan-soalan Ahli Dewan terhadap dasar kerajaan.

Namun nampaknya, Khaled Nordin hanya mampu berucap tahap Jamal Sekinchan, membuat tuduhan palsu dan berbaur perkauman. Ceramah politik ini menunjukkan bahawa beliau cuma berminat untuk melindungi kesilapan besar bos beliau, Perdana Menteri, Datuk Seri Najib Razak dalam skandal 1MDB.

Dalam ceramah politik Khaled Nordin di Dewan Negeri tersebut, beliau sekali lagi menggunakan taktik lama UMNO dengan memburukkan imej DAP dengan tuduhan perkauman. Khaled Nordin menuduh DAP tidak menjaga kepentingan kaum Melayu dan India di negeri Pulau Pinang.

Pada masa sama, parti rakan UMNO, MCA sentiasa menyerang DAP kerana kerajaan Pulau Pinang menaikkan

peruntukan hal ehwal Islam, serta sekolah agama setiap tahun sejak 2008. Tambahan pula, DAP diserang oleh parti rakan UMNO kerana akan membina sebuah Hospital Islam yang pertama di Pulau Pinang.

Justeru, siapa yang cakap benar dan siapa yang menipu? Khaled Nordin ataupun kawannya MCA? Adakah Pulau Pinang menindas Islam dan Melayu seperti dituduh oleh Khaled Nordin ataupun terlalu mengikut telunjuk orang Islam dan Melayu seperti tuduhan MCA?

Serangan terhadap DAP sebenarnya menunjukkan bahawa UMNO Johor yang dipimpin oleh Khaled Nordin sudah bankrap idea dalam persaingan dasar. Justeru UMNO kembali membuat perkara yang mereka paling arif, membuat hasutan perkauman. Khaled Nordin patut berasa malu atas kegagalan beliau sebagai Menteri Besar dan seharusnya meletak jawatan.

Adakah Pulau Pinang di bawah Pakatan Harapan anti-Islam?

Mengikut perangkaan, sebanyak RM37.25 juta telah diperuntukkan untuk hal ehwal Islam di negeri Pulau Pinang pada 2009, RM39.60 juta pada 2010, dan seterusnya, RM65.27 juta (2011), RM66.38 juta (2012), RM55.13 juta (2013) dan RM52.21 juta (2014).

Semasa era pentadbiran BN sebelum 2008, peruntukan yang paling tinggi cuma RM25.49. Malah, BN ketika itu tidak pernah memberikan peruntukan berkala satu sen pun kepada Sekolah Agama Rakyat (SAR).

Sebaliknya, kerajaan Pulau Pinang di bawah pimpinan Lim Guan Eng me-

nyalurkan peruntukan kepada SAR sebanyak RM1.5 juta setiap tahun daripada 2008 sehingga 2009 sebelum ditambah kepada RM1.75 juta setiap tahun pada 2010 hingga 2014. Dengan peruntukan tahunan ini juga, makmal sains dan makmal komputer berjaya didirikan buat kali pertamanya di SAR di negeri Pulau Pinang.

Semasa bulan Ramadhan tahun ini juga kerajaan negeri Pulau Pinang telah memperuntukkan RM15 juta untuk pembinaan Pusat Pendidikan Al-Itqan di kawasan Teluk Kumbar.

Pada masa yang sama, kerajaan negeri Pulau Pinang melalui Lembaga Wakaf Hindu (Penang Hindu Endowments Board) telah menghulurkan biasiswa kepada pelajar-pelajar komuniti India yang memerlukan bantuan kewangan. Setiap tahun, sebagaimana SAR tadi, Kerajaan Negeri Pulau Pinang telah memberikan peruntukan berkala RM1.7 juta kepada sekolah Tamil.

Kerajaan negeri juga memperuntukkan tanah untuk pembinaan Sekolah Menengah Tamil yang pertama di Malaysia, tetapi malangnya usaha penubuhan sekolah dihalang oleh Khaled Nordin di peringkat pusat.

Sehingga tahun 60-an, terdapat lebih 1,000 sekolah Tamil di seluruh negara, namun jumlah itu tinggal hanya 523 buah ekoran dasar perkauman UMNO-BN.

Di bawah pentadbiran Khaled Nordin tiada peruntukan untuk Sekolah Jenis Kebangsaan Cina (SJKC) setiap tahun, tiada bantuan untuk Sekolah Kebangsaan Jenis Tamil (SJKT) sehingga didesak

dalam Dewan Negeri oleh barisan pembangkang. Manakala, kerajaan Pakatan Harapan memperuntukkan RM8.5juta untuk semua Sekolah Menengah Kebangsaan, Sekolah Menengah Persendirian, SJKT dan Sekolah Katolik setiap tahun bermula tahun 2009.

Justeru, adakah Pulau Pinang meminggirkan kaum Melayu dan India dan memihak satu kaum sahaja?

Sebenarnya dasar kerajaan negeri Pulau Pinang amat jelas berasaskan nilai keadilan kepada semua. Rakyat Pulau Pinang pelbagai kaum dan agama dijaga melalui dasar ekonomi berkebajikan dan bukan perkauman seperti yang dimalkan oleh UMNO-BN. Nampaknya Khaled Nordin masih tidak mampu untuk melepaskan diri daripada pengaruh perkauman tersebut. Perbuatan beliau bukan sahaja mengecewakan rakyat berbilang kaum negeri Johor malah telah menghianati konsep Bangsa Johor. Beliau dalam gairah melindungi kerajaan kleptokrat peringkat pusat pimpinan "Malaysia Official 1" (MO1) serta ingin menutup aib kerajaan negeri Johor pimpinan beliau sendiri yang telah gagal dalam persaingan dengan Pulau Pinang telah membongkok begitu bawah menyerang DAP dengan penipuan dan perkauman.

Ceramah politik beliau hanya retorik tanpa fakta, ini jauh berbeza dengan wibawa Menteri Besar Johor terdahulu mahupun Ketua Menteri Pulau Pinang. Saya mengesyorkan kepada Menteri Besar agar belajar daripada Tan Sri Muhyiddin Yassin ataupun Lim Guan Eng dan bukan dengan Jamal Sekinchan.

BERSIH 5: RAKYAT MALAYSIA SATUKAN TENAGA DEMI MALAYSIA BARU



Merungkai perincian Belanjawan 2017: Benarkah rakyat jadi keutamaan?

Oleh SYAZANA HASANUDIN

Belanjawan 2017 yang dibentangkan oleh Perdana Menteri, Datuk Seri Najib Razak pada 21 Oktober lalu menimbulkan banyak ‘cakap-cakap belakang’ di kalangan rakyat negara ini. Di sebalik sindiran-sindiran tajam kepada pakatan pembangkang dan bekas Perdana Menteri Tun Mahathir Mohamad, Najib dalam ucapannya di Parlimen cuba mempamerkan belanjawan itu sebagai pro-rakyat, salah satunya dengan menegaskan pertambahan jumlah pemberian Bantuan Rakyat 1Malaysia (BR1M) kepada mereka yang layak pada tahun hadapan.

Maka tidak hairanlah apabila media rata-ratanya cuba ‘mengusik’ Perdana Menteri dengan memanggil belanjawan yang diumumkannya itu sebagai ‘belanjawan pilihan raya’.

Namun, ramai pihak yang mengkaji butiran belanjawan itu secara terperinci menemui sebaliknya. Jika diamati secara teliti, kebanyakan peruntukan yang disebut dalam Belanjawan 2017 bukanlah satu penambahbaikan, sebaliknya sudah wujud dalam dokumen belanjawan untuk tahun-tahun sebelum ini.

Ahli Parlimen Serdang, Dr. Ong Kian Ming ketika dihubungi Roketkini berkata contoh yang paling ketara adalah peruntukan yang disalurkan kepada Kementerian Pelajaran untuk program bantuan murid-murid kurang berkemampuan di peringkat sekolah rendah dan menengah. Bagi program bantuan makanan asrama, ia telah dikurangkan sebanyak RM15 juta dari tahun sebelumnya. Perkara sama berlaku kepada peruntukan bantuan pengangkutan kepada pelajar asrama yang turut dikurangkan sebanyak RM3.6 juta.

“Perdana Menteri juga mengumumkan peruntukan sebanyak RM7.4 bilion kepada 20 universiti awam dan RM1.4 bilion kepada hospital pengajar. Walaupun jumlahnya kelihatan banyak, dokumen belanjawan menyatakan sebaliknya.

Pemotongan peruntukan : Rakyat akan terbebani?

“Perbelanjaan operasi bagi universiti awam pula telah dikurangkan dari RM7.6 bilion pada 2016 kepada RM6.2 bilion pada 2017, bermakna wujud penarikan peruntukan sebanyak RM1.4 bilion. Pada masa sama, dana untuk tiga hospital pengajar dikurangkan lebih dari RM150 juta,” terangnya.

Bagi Dr. Ong, pemotongan peruntukan kepada universiti awam tersebut cuma salah satu dari pelbagai item lain yang turut berdepan dengan pemotongan. Sebuah analisis yang lebih terperinci akan mendedahkan item-item yang ‘tersembunyi’ itu.

Beliau mendapati, peruntukan untuk Jabatan Alam Sekitar turut dipotong dari RM122.7 juta kepada RM93.6 juta. Malah, jumlah peruntukan untuk



pengawasan dan penguatkuasaan alam sekitar dipotong dari RM105 juta kepada RM76.5 juta.

Menurutnya, pemotongan besar untuk aktiviti-aktiviti tersebut akan menjelaskan keupayaan agensi berkenaan untuk memantau pencemaran, sekaligus memudarkan kualiti hidup masyarakat Malaysia.

“Di saat sungai kita semakin terdedah kepada pencemaran, peruntukan untuk pemantauan dan penguatkuasaan patut dinaikkan sebanyak 30 peratus dan bukannya dipotong sebanyak itu,” jelasnya.

Beliau menambah, warga Serdang kerap membuat aduan berhubung masalah bau dan pencemaran yang berpunca dari aktiviti kilang di kawasan itu pada waktu malam.

“Apabila aduan itu disampaikan kepada Jabatan Alam Sekitar, mereka mendakwa peruntukan yang diberi tidak mencukupi bagi menjalankan aktiviti pemantauan dan pelaksanaan secara berkesan. Sedangkan ia penting memandangkan isu pencemaran sungai kini semakin berleluasa, bukan saja di Selangor dan KL tetapi juga di negeri-negeri lain seperti Negeri Sembilan,” ujarnya.

Selain hal perkhidmatan pengajian dan alam sekitar, Dr. Ong berkata, peruntukan bagi hal kesihatan turut mengalami pengurangan dalam belanjawan kali ini. Walaupun peruntukan untuk perbelanjaan operasi Kementerian Kesihatan mengalami peningkatan sebanyak RM2 bilion, terdapat beberapa perkhidmatan yang mengalami pengurangan.

Sebagai contoh, perkhidmatan pemindahan darah mengalami potongan sebanyak RM21 juta, farmasi dan bekalan awam dipotong sebanyak RM86 juta serta penyelidikan perubatan berdepan potongan sebanyak RM9.05 juta.

Semua pemotongan dalam belanjawan

berkenaan, katanya, membuktikan bahawa kerajaan sedang menghadapi krisis kewangan akibat tekanan ekonomi yang mendesak sejak kebelakangan ini, lebih-lebih lagi apabila hasil yang dijanjikan tidak begitu memberangsangkan.

Ia, jelasnya, diburukkan lagi dengan kewujudan perbelanjaan secara tidak terkawal di sesetengah kementerian seperti Jabatan Perdana Menteri.

Hal ini menimbulkan persoalan, sama ada kenyataan Najib selama ini bahawa keadaan kewangan kerajaan berada dalam keadaan baik-baik sahaja, cuma satu retorik yang terpaksa dilontarkan bagi ‘memujuk’ hati rakyat Malaysia yang semakin keluh-kesah akibat digasak beban ekonomi.

Lesapnya subsidi untuk rakyat

Melalui bacaan analisisnya, Penolong Setiausaha DAP Selangor itu turut mengenalpasti item-item yang telah ‘lesap tanpa bayang’ dalam belanjawan 2017 tersebut. Paling memerlukan, dua item yang tidak ditemui dalam dokumen itu adalah hal-hal yang amat dekat dengan rakyat, iaitu pampasan bagi menunda kenaikan kadar tol dan subsidi minyak masak.

“Dalam belanjawan 2016, sebuah bayaran ‘one-off’ berjumlah RM593 juta bagi menunda kenaikan kadar tol diperuntukkan di bawah Kementerian Kerja Raya. Tetapi ia tiba-tiba hilang dalam belanjawan kali ini!

“Ini bermakna kadar tol hampir pasti akan naik, termasuk Lebuhraya Utara-Selatan yang dimiliki PLUS - sesuatu yang bertentangan dengan janji manifesto BN dalam Pilihan Raya Umum ke-13 yang lalu,” ujarnya.

Berkenaan subsidi minyak masak pula, Dr. Ong menyatakan sebelum ini item itu boleh ditemui di bawah peruntukan kepada Kementerian Perusahaan Perladangan dan Komoditi, namun ia langsung tidak ada di dalam belanjawan

kali ini.

Langkah terbaru kerajaan pimpinan Najib itu, jelasnya, akan membawa kesan besar kepada golongan kurang berkemampuan yang sedia terjejas akibat pelaksanaan cukai barang dan perkhidmatan (GST) sejak April tahun lalu.

Beliau menambah, pemansuhan subsidi berkenaan tanpa memansuhkan GST akan melebarkan lagi jurang pendapatan dan mengakibatkan keadaan golongan kurang berkemampuan semakin parah.

“Bercanggah dengan janji Menteri Kewangan Kedua Datuk Johari Abdul Ghani, tidak ada jaminan bahawa program subsidi akan diteruskan dalam Belanjawan 2017.

“Saya yakin jika dikaji dengan lebih teliti, ada item-item lain yang telah dikeluarkan dari belanjawan kali ini yang akan memberi kesan langsung kepada kos sara hidup rakyat Malaysia,” katanya.

Mendahulukan syarikat kroni?

Pada masa sama, bacaan analisisnya turut mengenalpasti item yang membawa lebih banyak manfaat kepada syarikat-syarikat kroni kerajaan berbanding rakyat kebanyakan. Salah satunya adalah peruntukan kepada perkhidmatan sokongan hospital.

“Walaupun Kementerian Kesihatan mengalami pemotongan dana, peruntukan seperti perkhidmatan sokongan hospital yang bernilai RM2 bilion tidak dipotong kerana ia akan membantu syarikat-syarikat yang mendapat kontrak penswastaan tersebut,” ujar Dr. Ong.

Beliau merujuk kepada program khas yang dipanggil ‘Penswastaan Perkhidmatan Sokongan Hospital’ berjumlah RM2.01 bilion yang tiba-tiba saja dimasukkan ke dalam Belanjawan 2017 tanpa sebarang pengumuman dari pihak kerajaan terlebih dahulu. Malah, Najib tidak menyebut tentang item baru itu di dalam ucapan belanjawannya.

“Bagaimana sebuah perbelanjaan yang begitu besar boleh dimuatkan ke dalam belanjawan tanpa sebarang pengumuman atau penerangan dari Menteri? Yang kita bimbangkan, berapa banyak lagi item-item seperti ini ada di dalam belanjawan?” soalnya.

Dari bacaan analisis yang dibuat oleh Dr. Ong, jelas dilihat bahawa Belanjawan 2017 yang dibentangkan oleh Najib di sidang Parlimen pada akhir Oktober lalu hanyalah ‘indah khabar dari rupa’. Walaupun Perdana Menteri berkali-kali mendakwa ia sebuah belanjawan yang mendahulukan rakyat, perhatian secara terperinci telah menunjukkan sebaliknya.

Nampaknya Najib masih gagal meng‘transformasi’ kerajaan UMNO Barisan Nasional di bawah pimpinannya, apakah lagi mahu membawa transformasi ke seluruh negara. UMNO Barisan Nasional terbukti masih kekal sebagai parti yang menabur seribu satu janji, tetapi hilang entah ke mana selepas memperoleh undi.

Sejauh mana kejujuran Najib dalam Belanjawan 2017?

Oleh FATIH HASSAN NORDIN

Pembentangan belanjawan kerajaan merupakan perkara yang dinantikan rakyat setiap penghujung tahun bagi menyemak 'habuan' dan tak kurang juga meneliti peruntukan yang akan diagihkan kerajaan kepada sektor serta kementerian tertentu.

Mereka pastinya terpaku di hadapan kaca televisyen mahupun di corong-corong radio ataupun di kedai kopitiam, menanti dengan penuh debar dan sabar apa yang akan diucapkan Perdana Menteri, Datuk Seri Najib Razak.

Belanjawan defisit atau rugi sudah bermain di fikiran mereka terlalu lama dari tahun ke tahun, ia seolah-olah bukan perkara baru yang seharusnya dibimbangkan, apatah lagi untuk dibincangkan, kerana mereka hanya mahu dengar apa yang hendak didengar: laba.

Tidak mengapa, katanya, hutang yang terpaksa ditanggung kerajaan dan semakin meningkat saban tahun itu seringkali terubat dengan penambahan pemberian 'gula-gula' Bantuan Rakyat 1Malaysia (BR1M) yang menurut seorang Menteri BN, mampu bertahan setahun lamanya.

Maka, kita pun terpesona dengan senyum mungil Perdana Menteri dengan bahasa yang dikaut dari teks ucapannya dan disimpulkan dengan penuh manis sekali. Namun, di sebalik 'bunga-bunga' itu, bak jerat halus kelindan sutera, ada muslihat yang menanti dan tersembunyi.

Cakap lain, hakikat lain?

Bukan ahli nujum, sebaliknya Ahli Parlimen Bukit Mertajam, Steven Sim yang sesuai dan elok dengan tugasnya mendapati terdapat percanggahan antara apa yang ditulis Najib di atas kertas dengan apa yang diucapkan Najib di Parlimen pada Jumaat, 21 Oktober 2016.

Dengan serius beliau menyemak ucapan Belanjawan 2017 Najib yang juga Menteri Kewangan dalam baris 291 mengenai peruntukan sebanyak RM30 juta bagi dua program kesihatan wanita yang terpenting, iaitu ujian mamogram dan vaksin HPV.

Namun, menurut Steven Sim: "Pada tahun ini, kedua-dua item tersebut tidak dapat ditemui dalam Anggaran Perbelanjaan Persekutuan sama ada di bawah Kementerian Pembangunan Wanita, Keluarga dan Masyarakat, Kementerian Kesihatan ataupun Jabatan Perdana Menteri."

Jadi, apa maksudnya di sini? Adakah Najib selaku kepala pentadbiran dan pelaksana dasar sudah menipu rakyat bulat-bulat di Dewan Rakyat yang mulia dan di penghulu segala hari yang barakah itu?

Apa lagi yang diucap Najib tapi tidak ada dalam belanjawan?

Tidak berpuas hati dengan 'penipuan' itu, Steven kembali kepada teks ucapan



"Jadi, apa yang akan berlaku apabila ucapan belanjawan mengumumkan 'berita baik' yang tidak wujud di dalam Anggaran Perbelanjaan Persekutuan mahupun Anggaran Hasil Kerajaan Persekutuan?"

Najib ke baris 207. Sekali lagi beliau mendapati peruntukan yang diagihkan Najib kepada Suruhanjaya Komunikasi dan Multimedia Malaysia (SKMM) hanyalah RM57.4 juta.

Peruntukan di bawah 'perbelanjaan pembangunan' untuk 'projek jalur lebar' itu bagaimanapun disebutnya di Parlimen adalah bernilai RM1 bilion. Gebang Najib itu meningkatkan belanjawan atas kertas kepada lebih 40 peratus daripada nilai sebenar seperti dalam anggaran rasmi.

"Pada Baris 224 pula, Najib mengumumkan sebuah lagi 'berita baik' kononnya SKMM akan memperuntukkan RM340 juta untuk tablet percuma kepada 430,000 guru seluruh negara sebagai bantuan mengajar.

"Rupa-rupanya, sebuah lagi 'berita baik' ini hanyalah sebuah lagi percanggahan, apabila tidak ada satu pun tentangnya disebut dalam Anggaran Perbelanjaan Persekutuan.

"Malah, peruntukan untuk perkhidmatan dan bekalan kepada sekolah rendah dan menengah dipotong sebanyak 82 peratus dan 62 peratus berbanding 2016!" kata Steven.

Apa yang boleh kita buat?

"Ucapan (Najib) itu hanya menggariskan dasar belanjawan kerajaan bagi tahun akan datang. Ia menyerlahkan iklim ekonomi negara serta hal-hal utama dalam belanjawan. Tidak hairanlah, ia biasanya mengandungi 'berita baik,' ujar Steven.

Beliau mengutarakan pandangan itu dengan memetik fakta kes Mahkamah Agung di India bagi kes Amin Merchant

v Chairman, Central Board of Excise & Revenue & Ors.

Menurut Steven: "Mahkamah memutuskan 'ucapan Menteri Kewangan dan cadangan kewangan/belanjawan yang diluluskan oleh Parlimen adalah dua dokumen berasingan dan berbeza; undang-undang yang dikuatkuasakan adalah apa yang terkandung dalam Akta Kewangan selepas ia digubal bersama oleh Parlimen."

"Mahkamah turut menegaskan, 'ucapan Menteri Kewangan hanya mengetengahkan cadangan-cadangan penting daripada belanjawan. Ia bukanlah akta Parlimen. Undang-undang yang dikuatkuasakan adalah apa yang terkandung dalam Akta Kewangan."

Pendek kata, kata Steven, ucapan belanjawan oleh Najib bukanlah gambaran belanjawan sebenar yang akan dikeluarkan kerajaan, justeru tidak mustahil lah Najib boleh menjanjikan bulan dan bintang kepada rakyat demi kepentingan kuasanya.

"Semua ini akan digubal ke dalam Akta Bekalan, Akta Kewangan dan sebagainya.

Perbelanjaan kerajaan dan aktiviti penjanjana hasil bagi tahun kewangan akan datang adalah terikat dengan had yang ditetapkan oleh undang-undang tersebut. Secara teknikalnya, ia adalah belanjawan.

"Jadi, apa yang akan berlaku apabila ucapan belanjawan mengumumkan 'berita baik' yang tidak wujud di dalam Anggaran Perbelanjaan Persekutuan mahupun Anggaran Hasil Kerajaan Persekutuan?"

"Dalam kes ini, tidak ada

jaminan bahawa 'berita baik' itu akan dilaksanakan, kerana ucapan belanjawan bukanlah belanjawan. Justeru, kerajaan tidak terikat dengan ucapan belanjawan," tambahnya.

Tiada kredibiliti, Steven rujuk Najib ke Jawatankuasa Hak dan Kebebasan

Kita sedar bahawa, melalui rentetan pembongkaran percanggahan ucapan Najib itu dengan Anggaran Perbelanjaan Persekutuan ada sesuatu yang salah dan tidak wajar dilakukan Najib yang seharusnya menjadi contoh kepada rakyat di negara ini.

Steven beranggapan "ucapan Belanjawan 2017 yang dibentangkan Najib bukan sekadar sangat berbau politik, menyindir dan memburbur-burukkan pembangkang dan pengkritik beliau, tetapi juga amat tidak profesional serta tidak berkualiti."

Justeru itu, pada 26 Oktober, Steven telah menghantar sepuak surat kepada Speaker Dewan Rakyat, Tan Sri Pandikar Amin Mulia untuk merujuk Najib ke Jawatankuasa Hak dan Kebebasan mengikut Peraturan Mesyuarat 36(12) kerana mendakwa ucapan belanjawan Perdana Menteri itu telah mengelirukan dewan.

Bagaimanapun, pada 3 November, Pandikar telah membuat ketetapan bahawa usul yang dibawa Steven itu tidak wujud prima facie atau keraguan yang munasabah untuk merujuk Ahli Parlimen Pekan itu ke Jawatankuasa Hak dan Kebebasan.

Malah, Steven telah diarahkan oleh Pandikar untuk meninggalkan dewan sebanyak lima kali kerana tidak berpuas hati dengan keputusan Pandikar.

Apa yang boleh kita simpulkan daripada aliran peristiwa ini? Adalah jelas bahawa Najib yang mewakili Barisan Nasional dalam tumpuk pemerintahan negara telah menyediakan perkara yang muluk-muluk untuk didengari dan ditatap oleh rakyat.

Sambil itu, Najib juga menyembunyikan hakikat bahawa negara kini dilanda krisis ekonomi yang kian meruncing, dengan nilai pertukaran matawang kira RM4.60 berbanding US dollar dan dijangka oleh pakar ekonomi bakal mencecah RM4.80 dalam tempoh enam bulan akan datang.

MENUNTUT KEMBALI NEGARA KITA MELALUI BERSIH 5

Oleh ZAIRIL KHIR JOHARI

Salah satu keunikan negara kita adalah jangka hayat panjang rejim pemerintah yang tidak pernah sekalipun kalah dalam pilihan raya umum sejak merdeka enam dekad yang lalu. Walau bagaimanapun, rekod unggul ini tiada kaitan dengan prestasi atau populariti.

Sebaliknya, ia dicapai atas kemampuan luar biasa kerajaan untuk terus memastikan peraturan permainan diatur untuk memihak mereka.

Buktinya jelas apabila kita meneliti strategi persempadanan semula kawasan pilihan raya yang telah dilaksanakan sejak bertahun-tahun. Malah, bekas pengurus Suruhanjaya Pilihan Raya (SPR) sendiri pernah mengakui bahawa semakan sempadan pilihan raya sering dijalankan dengan matlamat untuk memastikan keputusan politik yang memihak kepada parti pemerintah.

Hasil daripada itu, Barisan Nasional (BN) berjaya mengelakkan kuasa pada pilihan raya umum yang lepas dengan 60 peratus kerusi parlimen walaupun hanya mendapat 47 peratus undi popular, manakala gabungan pembangkang hanya memenangi 40 peratus kerusi meskipun menerima 51 peratus undi.

Jelas sekali, kehendak pengundi tidak dicerminkan pada keputusan pilihan raya.

Dengan cadangan persempadanan semula yang baru diumumkan oleh SPR, adalah jelas bahawa kehendak pengundi bukanlah keutamaan kerana agihan pengundi akan bertambah tidak sekata.

Mengabaikan Perlembagaan

Peruntukan perlembagaan pun tampaknya diabaikan oleh SPR. Secara khusus, subseksyen 2(c) Jadual Ketiga Belas Perlembagaan Persekutuan menyatakan dengan jelas bahawa:

"bilangan pemilih di dalam setiap bahagian pilihan raya di dalam sesuatu Negeri patutlah lebih kurang sama banyak kecuali bahawa, dengan mengambil kira kesulitan yang lebih besar untuk sampai kepada pemilih di dalam daerah desa dan kesukaran lain yang dihadapi oleh bahagian-bahagian pilihan raya di luar bandar, ukuran pewajaran bagi kawasan patutlah diberikan kepada bahagian-bahagian pilihan raya;"

Implikasi utama daripada peruntukan ini adalah bahawa saiz kerusi dalam sesebuah negeri sepatutnya sedapat mungkin lebih kurang sama antara satu sama lain, dengan kaveat yang membenarkan perwakilan yang lebih berdasarkan saiz kawasan.

Dalam erti kata lain, kawasan yang besar dari segi geografi dibolehkan mempunyai pengundi lebih kecil berbanding kawasan bandar yang padat, namun had perbezaannya kini tidak jelas berikutan pindaan Perlembagaan pada tahun 1973 yang mengeluarkan klausa yang menentukan bahawa sesebuah kawasan luar bandar boleh memiliki separuh daripada pemilih sesebuah kawasan bandar.

Sungguhpun begitu, adalah munasabah untuk menganggap bahawa perbezaan bilangan pemilih antara mana-mana dua kerusi di dalam sesebuah negeri tidak patut melebihi dua atau tiga kali ganda, ataupun lebih lagi seperti yang berlaku kini.

Namun, nampaknya SPR sama sekali tidak menghiraukannya. Satu contoh ketara adalah kes kawasan dewan undangan negeri Paya Terubong dan Air Putih di Pulau Pinang. Bilangan pemilih Paya Terubong telah meningkat kepada 41,707 pengundi sementara Air Putih berkurang kepada 12,752 pengundi. Perbezaan 3.3 kali ganda ini amat menghairankan, khususnya apabila kedua-dua kerusi ini adalah jiran secara geografi.

Di peringkat kawasan parlimen pula, dua kawasan dari daerah yang sama, iaitu Bukit Gelugor dan Tanjong, juga memperlihatkan pengagihan pengundi yang sangat tidak sekata. Dengan 84,755 pengundi, Bukit Gelugor adalah kawasan parlimen terbesar di Pulau Pinang manakala

Tanjong adalah yang paling kecil dengan hanya 50,324.

Ini bermakna beza bilangan pemilih antara Bukit Gelugor dan Tanjong adalah 1.68 kali ganda. Dalam kes ini, seperti mana dalam kes Paya Terubong dan Air Putih juga, jurang yang begitu mencolok tidak sepatutnya timbul kerana alasan bagi membolehkan perbezaan bilangan pemilih tidak terpakai kerana ia semuanya melibatkan kerusi di kawasan bandar yang tidak mempunyai masalah logistik.

Mengalihkan tiang gol

Jelas sekali, kegagalan untuk melakar semula sempadan bagi menyeimbangkan saiz kawasan pilihan raya adalah pengabaian tugas oleh SPR. Pun begitu, sementara impak politik bagi kes-kes pembahagian pengundi yang tidak sekata di Pulau Pinang mungkin boleh dikatakan tidak cukup signifikan untuk memberi kesan kepada neraca politik di negeri itu, pencabulan subseksyen 2(c) yang turut berlaku di Selangor sudah tentu akan mengakibatkan kesan yang mendalam.

Cadangan persempadanan semula yang diumumkan untuk Selangor amat drastik dan terang-terangan direka untuk mencapai matlamat politik pemerintah kerajaan pusat. Berdasarkan perubahan yang dicadangkan, beberapa kerusi parlimen yang dikuasai pembangkang telah diperbesarkan dengan memasuki daerah-daerah mengundi yang cenderung kepada pembangkang bagi membentuk kubu kuat pembangkang yang amat besar. Hal ini juga bermaksud bahawa kerusi jiran akan kehilangan penyokong pro-pembangkang mereka.

Ambil sebagai contoh kawasan parlimen Petaling Jaya Utara yang dimenangi pembangkang dengan majoriti besar bagi dua penggal berturut-turut. Berdasarkan persempadanan semula yang terbaru ini, saiznya hampir digandakan daripada 85,401 pengundi kepada 150,439. Ini dilakukan dengan menyerap keseluruhan kawasan dewan undangan negeri Bukit Lanjan, lantas mengecilkan saiz kawasan parlimen Subang yang kehilangan Bukit Lanjan serta sebahagian besar penyokong pembangkang.

Dalam erti kata lain, sementara pembangkang bakal mengelakkan Petaling Jaya Utara (atau nama baru yang dicadangkan, Damansara) dengan majoriti yang lebih besar, Subang (atau nama barunya Sungai Buloh) akan menjadi jauh lebih mudah untuk dikehilangkan BN.

Trend yang sama juga boleh dilihat di kawasan-kawasan pembangkang lain seperti Serdang dan Klang, yang kedua-duanya bakal bertambah saiz dan majoriti sementara jiran-jiran mereka, Hulu Langat dan Kapar, bakal menjadi lebih sukar untuk dikekalkan pembangkang.


Matlamat yang ingin dicapai daripada persempadanan semula kawasan ini amat jelas. Analisa berdasarkan pola pengundian pilihan raya umum ketiga belas mendapat bahawa pihak pembangkang akan kehilangan tujuh kerusi di negeri Selangor, sementara lapan lagi kerusi akan menjadi marginal. Justeru, sekiranya cadangan ini diwartakan, BN akan mencatat kemenangan sebelum kempen pilihan raya bermula.

Satu orang, satu undi, tiada nilai

Senario ini juga mengakibatkan ketidaksaksamaan dalam nilai undi, kerana pengundi di kawasan pilihan raya yang sangat besar akan jauh kurang diwakili berbanding mereka di kawasan-kawasan yang kecil.

Di Selangor, umpamanya, kerusi Damansara (Petaling Jaya Utara) dengan pengundi seramai 150,439 adalah





SARISUL SIDIK/NEW IMAGE/ASPIRACI/GETTY IMAGES

empat kali ganda kerusi Sabak Bernam dengan 37,126 pengundi.

Ini bermakna bahawa pengundi Sabak Bernam mempunyai nilai undi empat kali lebih daripada pengundi di Petaling Jaya Utara. Keadaan ini sama sekali tidak wajar dan tidak boleh diterima menurut Perlembagaan yang memperuntukkan bahawa saiz antara kerusi seharusnya "lebih kurang sama".

Akibat daripada pembahagian pengundi yang tidak sekata ini, kira-kira satu setengah juta pengundi atau 13.5 peratus daripada 11.3 juta pengundi berdaftar di Malaysia akan kurang diwakili ataupun mengalami keadaan under-representation secara ketara kerana mereka merupakan pengundi dalam 13 kerusi "maha besar" yang mempunyai bilangan pengundi lebih daripada seratus ribu.

Kerusi-kerusi ini, yakni Damansara (150,439), Bangi (146,1680), Klang (141,275), Petaling Jaya (129,363), Subang (128,330), Gelang Patah (112,081), Kota Raja (121,126), Pasir Gudang (108,156), Kota Melaka (105,067), Kuala Terengganu (101,875), Sungai Petani (101,829), Tumpat (101,318) dan Kapar (100,456), adalah jauh lebih besar berbanding saiz purata kawasan parlimen di semenanjung, iaitu sekitar 68,814 pengundi. Mungkin tidak begitu kebetulan, 12 daripada 13 kerusi ini merupakan kerusi yang dikuasai pembangkang. Tidakkah ini seakan-akan merompak nilai undi penyokong pembangkang?

Tidak bertindak itu bukan satu pilihan

Terdapat banyak lagi contoh yang boleh dipetik untuk membuktikan bahawa persempadanan semula yang dicadangkan

Dalam keadaan begini, tidak bertindak itu bukan satu pilihan. Setiap rakyat Malaysia yang percaya kepada masa depan demokrasi negara ini perlu menegaskan hak mereka untuk menolak cadangan persempadanan semula ini. Bantahan rasmi perlu difailkan oleh semua pihak yang berkepentingan.

alah tidak lebih daripada skim penipuan pilihan raya secara besar-besaran yang bertujuan bukan sahaja untuk mencuri kerusi daripada pembangkang tetapi juga untuk merampas hak dan nilai undi berjuta-juta pengundi.

Dalam keadaan begini, tidak bertindak itu bukan satu pilihan. Setiap rakyat Malaysia yang percaya kepada masa depan demokrasi negara ini perlu menegaskan hak mereka untuk menolak cadangan persempadanan semula ini. Bantahan rasmi perlu difailkan oleh semua pihak yang berkepentingan.

Dengan kerjasama Bersih 2.0 dan badan-badan aktivis lain, kerajaan negeri Selangor dan Pulau Pinang telah pun mengemukakan petisyen bantahan terhadap SPR. Wakil rakyat dan kumpulan-kumpulan pengundi juga telah digerakkan di kedua-dua negeri tersebut dan juga di seluruh negara. Jika bantahan ini tersekat atau ditolak, maka semakan kehakiman harus dirujuk.

Walau bagaimanapun, proses rasmi dan tindakan undang-undang sudah tentu sukar berjaya apabila institusi awam negara nyata tidak bersikap berkecuali. Dalam hal ini, tidak ada yang lebih kuat dan lebih berkesan sebagai alat bantahan daripada suara kolektif orang ramai yang berarak secara aman di jalan raya.

Jangan kita lupa, "tsunami politik" pada tahun 2008 sebahagian besarnya adalah akibat daripada perhimpunan Bersih pertama pada

tahun 2007 serta demonstrasi Hindraf tidak lama selepasnya.

Malah, adalah jelas keputusan pilihan raya umum 2013 telah didorong oleh semangat orang ramai berikutnya Bersih 2.0 dan Bersih 3.0 yang berjaya menyatukan imaginasi rakyat seluruh negara.

Kerajaan sendiri tidak mampu mengabaikan puluhan ribu rakyat Malaysia yang berdepan gas pemadih mata dan meriam air untuk menuntut pilihan raya bebas dan adil.

Hasilnya, beberapa pembaharuan pilihan raya telah dilaksanakan, termasuk penggunaan dakwat kekal untuk memastikan pengundian berganda tidak berlaku.

Tahun lalu, perhimpunan Bersih 4 menyaksikan setengah juta orang berkumpul di Kuala Lumpur dalam amalan kebebasan berhimpun terbesar yang pernah dilihat di negara ini. Namun perjuangan masih belum berakhir. Cadangan persempadanan semula terkini membuktikan bahawa sang penguasa semakin terdesak dan sanggup menggunakan apa-apa cara, busuk atau adil, untuk memastikan kelangsungan pemerintahan mereka.

Maka, adakah kita akan duduk berdiam dan membolehkan mereka untuk mencuri masa depan kita sebagaimana yang mereka telah lakukan terhadap cukai kita? Atau adakah kita akan sekali lagi berdiri teguh untuk mempertahankan hak kita?

Rakyat dambakan kerajaan yang mampu selesai masalah ekonomi – Guan Eng

OLEH SYAZANA HASANUDIN

SHAH ALAM: Asas bagi melawan politik perkauman parti UMNO Barisan Nasional (BN) adalah dengan menyediakan satu solusi kepada beban ekonomi yang melanda rakyat hari ini.

Setiausaha Agung DAP, Lim Guan Eng dalam ucapannya di sidang konvensyen Pakatan Harapan pada 12 November lalu berkata ia merupakan senjata paling ampuh bagi menewaskan propaganda politik identiti yang dimainkan UMNO BN.

“Barisan Nasional akan gunakan politik identiti dengan memainkan isu perkauman dan agama dalam pilihan raya akan datang.

“Mereka buat begitu supaya rakyat membenci pembangkang dan menunjukkan kononnya mereka salah satu-satunya pilihan yang ada dalam PRU14,” katanya.

“Oleh itu, kita mesti melawan politik identiti mereka dengan meletakkan ekonomi sebagai agenda utama perjuangan. Kita mesti membuktikan bahawa Pakatan Harapan mampu

menyelesaikan masalah ekonomi dan kenaikan kos sara hidup rakyat.”

Menurut Ketua Menteri Pulau Pinang itu, perkara tersebut boleh dilihat melalui kemenangan Barrack Obama dan Donald Trump sebagai Presiden Amerika Syarikat, masing-masing pada tahun 2008 dan tahun ini.

“Pada 2008, Amerika alami krisis ekonomi. Sama juga dengan tahun ini, di mana rakyat kelas pertengahan rasa amat terancam. Jadi mereka memilih menyokong Trump yang mengangkat kepentingan ekonomi kelas pertengahan.

“Jika ekonomi Amerika sihat, rakyat tak akan undi Trump.

“Perkara serupa sedang berlaku di Malaysia. Dengan nilai ringgit yang menjunam dan beban GST yang semakin terasa, rakyat mengadu tidak cukup belanja,” katanya.

Dalam pada itu, Guan Eng melahirkan pendapatnya bahawa perjuangan Pakatan haruslah berdasarkan Perlembagaan Persekutuan sebagai undang-undang tertinggi negara.

“Kita mesti jaga, lindungi dan



pertahankan undang-undang dan semangat Perlembagaan Persekutuan secara habis-habisan.”

Beliau turut menjelaskan, semua pihak yang mahu bekerjasama bagi menentang kerajaan UMNO BN haruslah menentang skandal milik Kementerian Kewangan, 1MDB dan bukan hanya berpura-pura menentangnya.

“Kita tahu rakan-rakan Pakatan dan juga Parti Pribumi seperti Tan Sri Muhyiddin dan Mukhriz benar-benar menentang 1MDB. Jadi kita harus bekerjasama dengan

mereka.

“Lawan rasuah ini sepatutnya tiada batasan, tiada sempadan. Asalkan rasuah, kita lawan habis-habisan,” tegasnya sambil menambah, pihak yang ingin melawan BN dalam pilihan raya nanti haruslah bersungguh-sungguh mahukan kemenangan agar kerajaan BN dapat benar-benar dikalahkan.

“Bila kita lawan BN, ia adalah untuk ganti BN. Bukan suka-suka bertanding, yang akhirnya menyebabkan BN menang. Jika kita nak bersama dengan parti-parti sebegini, susahlah. Saya sebut ini secara ikhlas,” katanya.

Konvensyen yang berlangsung di bangunan IDCC itu adalah Konvensyen Pakatan Harapan yang pertama diadakan.

Ia dihadiri lebih 1,500 perwakilan dari DAP, PKR dan Amanah bagi membincangkan strategi berhadapan pilihanraya akan datang.

Turut hadir ialah wakil dari Parti Pribumi Bersatu termasuk mantan perdana menteri Tun Dr Mahathir dan beberapa pimpinan utama parti serpihan UMNO itu. —Roketkini.com

Tun Mahathir sokong agenda reformasi dan BERSIH

Oleh HAFIZ ZAINUDDIN

SHAH ALAM: Bekas perdana menteri Tun Dr Mahathir Mohamad menyokong agenda reformasi pilihanraya berikutan gejala politik wang yang berluasa dalam negara ini.

Beliau memuji Bersih dalam tuntutan mereka terhadap kerajaan untuk mengembalikan demokrasi dan pilihanraya bersih dalam negara ini.

“Saya tak ada masalah sokong reformasi.

“Dalam pilihanraya, bila (pengundi) dapat wang, pemikiran kelabu sikit,” katanya diikuti sorakan perwakilan

dalam Konvensyen Pakatan Harapan yang berlangsung pada 12 November lalu.

Menurut Penasihat Parti Pribumi Bersatu itu, Najib akan sedaya upaya menghalang himpunan aman Bersih dengan menggunakan samseng Baju Merah.

“Sekarang Najib nak halang Bersih, untuk ini dia ada penyangak samseng.

“Samseng ini entah dapat duit dari mana cuba nak cetuskan huru-hara, cuba serang baju kuning,” katanya.

Beliau berkata walaupun ada penyokong Bersih diserang kumpulan Baju Merah, mereka terus

menunjukkan sikap berani, tidak melawan dan tidak mencetuskan huru-hara.

“Kalau baju kuning balas, Najib akan kuat kuasakan undang-undang keselamatan dan tangkap sesiapa sahaja,” ujar beliau.

Beliau menambah, satu-satunya cara untuk menumpaskan Barisan Nasional dalam pilihanraya akan datang adalah dengan penyatuan parti-parti pembangkang negara ini.

“Untuk lawan BN, tak ada yang lebih mustajab selain daripada perpaduan parti-parti lawan dalam PH,” katanya.

Untuk menang dan membentuk

kerajaan, justeru parti-parti pembangkang ujarnya perlulah memberi tumpuan khusus dalam menewaskan BN.

“Cara lawan BN adalah dengan bersatu! Dengan itu kita akan dapat kemenangan,” tegas Tun Dr Mahathir.

Ini termasuklah dengan penyertaan Bersatu ke dalam gabungan Pakatan Harapan.

“Bersatu belum lagi jadi PH tapi niat kita adalah untuk bersama.

“Tak lama lagi kami harap akan diterima PH supaya kita dapat bersuara tewaskan pemimpin-pemimpin ‘kleptokrat,’” tegas beliau.



Kawan lama...

Penasihat DAP, Dr Chen Man Hin merupakan rakan sekuliah Tun Dr Mahathir sewaktu di universiti.

Setelah sekian lama menjadi seteru politik, dua orang doktor ini akhirnya kembali dalam satu jalur politik, dengan tujuan besar untuk menumbangkan UMNO dan Barisan Nasional dalam pilihanraya umum akan datang. Kelihatan dua tokoh ini berjabat mesra ketika bertemu di Konvensyen Pakatan Harapan.

Belanjawan P. Pinang: Kakitangan awam dapat bonus, insentif tambahan untuk guru agama

GEORGE TOWN: Kerajaan Pakatan Harapan Pulau Pinang mengumumkan bonus akhir tahun sebanyak setengah bulan gaji atau minimum RM700 kepada seluruh kakitangan awam negeri itu.

Pengumuman itu dibuat Ketua Menteri Lim Guan Eng dalam pembentangan Belanjawan 2017 Pulau Pinang yang berlangsung pada 15 November lalu.

Bayaran bonus yang akan dibuat pada bulan Disember ini melibatkan 4,178 penjawat awam negeri itu dengan peruntukan sebanyak RM4.19 juta.

"Kerajaan Negeri bersetuju mengambil kira kenaikan harga barang termasuk minyak petrol, minyak masak dan bahan-bahan subsidi yang lain serta meluluskan bayaran bonus akhir tahun bersamaan dengan 0.5 bulan atau 1/2 bayaran gaji bulanan penjawat awam atau minimum RM700," katanya.

Kerajaan Negeri juga katanya meluluskan bayaran tambahan sebanyak 0.25 bulan atau 1/4

bulan gaji kepada mereka yang tidak mengambil cuti sakit swasta melebihi 4 hari sehingga November 2016 serta tidak diluluskan cuti sakit tambahan sebagai insentif kehadiran kerja.

"Adalah diharapkan bayaran bonus ini akan meningkatkan semangat untuk memberikan perkhidmatan yang lebih cemerlang lagi di tahun mendatang," ujar beliau.

Selain itu, Kerajaan Pakatan Harapan Pulau Pinang turut memberikan RM300 kepada 1,502 Penyelia dan Guru KAFA, 225 Guru Sekolah Rendah Agama Rakyat, 185 Guru Sekolah Menengah Agama Rakyat serta 522 Guru dan kakitangan Sekolah persendirian Cina.

Manakala, sebanyak RM200 pula diberikan kepada 279 Guru Tahfiz, Guru Pondok dan Guru TADIS Negeri Pulau Pinang.

Pembayaran ini kata ADUN Air Putih itu akan melibatkan tambahan perbelanjaan berjumlah RM786,000 yang akan dibayar pada Disember 2016.



Cukai pintu dikecualikan untuk ringankan beban rakyat

GEORGE TOWN: Pemberian pengecualian cukai pintu kepada pemilik rumah kos rendah, rumah sederhana rendah dan rumah kampung akan diteruskan oleh Kerajaan Negeri Pakatan Harapan.

Ketua Menteri Pulau Pinang Lim Guan Eng berkata, pengecualian cukai yang melibatkan penyerapan kos hampir RM14.1 juta itu adalah bukti bahawa kerajaan negeri amat prihatin dengan beban yang ditanggung rakyat berpendapatan rendah ekoran dihambat pelaksanaan cukai barang dan perkhidmatan (GST).

Menurutnya, jumlah pengecualian cukai berkenaan adalah berdasarkan cukai pintu yang dipungut oleh Majlis Bandaraya Pulau Pinang (MBPP) iaitu berjumlah RM8.06 juta dan Majlis Perbandaran Seberang Perai (MPSP) berjumlah RM6.03 juta pada tahun 2017.

"Selain daripada pengecualian cukai yang diberikan sebanyak RM14,093,705.78, Kerajaan Negeri juga terpaksa menanggung bebanan GST yang dianggarkan sebanyak RM46.2 juta setahun."

"Kerajaan Negeri juga telah mengarahkan MBPP dan MPSP untuk menanggung beban GST untuk tahun 2016 sebanyak RM19.36 juta yang tidak akan dibayar oleh rakyat tetapi ditanggung oleh MBPP dan MPSP."

"Ini juga akan diteruskan untuk tahun 2017. Ini bermakna rakyat

"Kerajaan Negeri juga telah mengarahkan MBPP dan MPSP untuk menanggung beban GST untuk tahun 2016 sebanyak RM19.36 juta yang tidak akan dibayar oleh rakyat tetapi ditanggung oleh MBPP dan MPSP"

LIM GUAN ENG
Ketua Menteri Pulau Pinang

Pulau Pinang akan mendapat penjimatan sebanyak RM19.36 juta daripada tidak perlu membuat pembayaran GST," katanya dalam ucapan pembentangan Belanjawan 2017 di Dewan Undangan Negeri (DUN).

"Dengan pengecualian cukai pintu untuk pemilik rumah kos rendah dan rumah kos sederhana rendah sebanyak RM11.7 juta dan penjimatan daripada pembayaran GST bagi pihak rakyat sebanyak RM19.36 juta, MBPP dan MPSP akan menanggung kos sebanyak RM33.45 juta."

Selain itu, kata Guan Eng yang

juga Adun Air Puteh, kerajaan negeri turut akan memberikan potongan sebanyak enam peratus cukai pintu untuk semua jenis harta tanah lain termasuk harta tanah komersial.

"Potongan enam peratus ini akan menjimatkan pemilik di kawasan MBPP sebanyak RM11,829,732.70 dan untuk mereka di kawasan MPSP menjimatkan RM9,907,892.00."

"Untuk pemilik harta tanah yang bukan rumah kos rendah dan rumah kos sederhana rendah, potongan enam peratus cukai pintu akan menyebabkan beban kewangan sebanyak RM21.74 juta kepada MBPP dan MPSP," tambahnya.

BN potong peruntukan Kementerian Kesihatan, hospital kerajaan jadi mangsa

KUALA LUMPUR: Tindakan kerajaan UMNO Barisan Nasional memotong peruntukan bagi membina hospital baru dalam Belanjawan 2017 akan membawa kesan negatif kepada hal ehwal kesihatan rakyat.

Menurut Ahli Parlimen Kampar, Dr. Ko Chung Sen dalam satu kenyataan pada 14 November baru-baru ini, peruntukan untuk hospital baru dalam belanjawan tersebut hanya berjumlah RM177.2 bilion, satu penurunan sebanyak 35 peratus daripada RM273 bilion pada tahun lalu.

Jelasnya, kerajaan sedia ada tidak boleh berdalih dengan mendakwa dana tidak mencukupi bagi membina hospital kerana jumlahnya amat kecil berbanding RM55 bilion untuk pembinaan projek Landasan Keretapi Pantai Timur (ERCL).

"Sedangkan, kapadatan pesakit yang keterlaluan dan kesesakan pesakit yang perlu beratur panjang setiap hari jauh lebih teruk dari kesesakan lalulintas di jalan ke pantai timur."

"Mengapa Perdana Menteri memilih membina ERCL dengan kos tidak munasabah, tetapi tidak pula mahu membina hospital? Hospital di negara ini sudah lama dalam keadaan sesak dan daif sehingga mengancam keselamatan pesakit dan kakitangan," katanya.

Beliau yang juga seorang pakar bedah jantung menambah, Malaysia turut berdepan masalah kekurangan katil hospital dengan purata hanya 1.9 katil bagi setiap 1000 penduduk, dengan berada di kedudukan ke-119 daripada 190 negara.

Negara ini, katanya, amat jauh ketinggalan berbanding negara-negara berpendapatan tinggi yang mesti mempunyai nisbah sekurang-kurangnya sebanyak 6.13 per 1000 penduduk.

"Kita perlu membina paling kurang 25 hospital lagi yang bersaiz seperti Hospital Sultanah Aminah di Johor dengan kemampuan 1,200 katil untuk setanding dengan Singapura."

"Kita benar-benar memerlukan penambahan 100 hospital baru untuk mencapai nisbah katil yang sesuai dengan objektif kita untuk menjadi negara berpendapatan tinggi," ujar Ahli Jawatankuasa DAP Perak itu.

Setiakawan rakyat Malaysia kepada Maria Chin Abdullah



Beliau ditahan sehari sebelum perhimpunan aman Bersih 5 berlangsung di bawah Akta Kesalahan Keselamatan (Langkah-Langkah Khas) (SOSMA) 2012.

Maria ditahan dalam tempoh maksimum 28 hari dan disiasat menurut Seksyen 124C Kanun Keseksaan atau 'cubaan menggugat demokrasi berparlimen'. Sejak penahannannya, Maria terus menerima sokongan rakyat dengan siri-siri himpunan solidariti di perkaranan lokap polis di Jinjang dan Dataran Merdeka.

Selain Maria, ramai aktivis dan pemimpin politik turut ditahan dan disiasat dan dibebaskan. Perhimpunan Bersih 5 yang belangsung 19 November lalu berakhir aman tanpa sebarang kejadian buruk. Maria akhirnya dibebaskan selepas 10 hari ditahan di bawah SOSMA.

